

撫安東夷記 防邊紀事
伏戎紀事 撻虜紀事



Z121

1

:3976

撫
安
東
夷
記

馬文升
撰

中
華
書
局

撫安東夷記

叢書集成初編所
選紀錄彙編今獻
彙言皆收有此書
紀錄較勝故據以
影印

紀錄彙編卷之三十六

撫安東夷記

馬文升

洪惟我太祖高皇帝膺天眷命奄有萬方以西
北密爾胡戎乃設陝西行都司於甘州山西行都司
于大同萬全都司於宣府又於喜峰口外古惠州地
設大寧都司遼東遼陽設遼東都司陝西寧夏卽趙
元昊所居地設寧夏左等五衛而遼之廣寧尤北虜
要衝復設廣寧等五衛與各都司并寧夏咸號重鎮
焉時則封肅王於甘州慶王於寧夏代王於大同

谷王於宣府寧王於大寧遼王於廣寧以藩屏王室
捍禦胡虜凡有不廷卽命諸王討之所以三十餘
年胡虜不敢南牧迨我太宗文皇帝遷都北平始
徙大寧都司於保定府而其所屬營州等一十餘衛
所亦省入順天永平二府地方時谷府未之國卽改
湖廣之長沙遷寧府於江西之南昌遷遼府於湖廣
之荊州乃以大寧之地自古北口至山海關立朶顏
衛自廣寧前屯衛至廣寧迤陳雲山立太寧衛自白
雲山迤東至開原立福餘衛處處之附近者旣又以
開原東北至松花江海西一帶今之野人女真分爲

二百七十餘衛所皆錫印置官官雖多寡不一皆選其酋長及族目授以指揮千百戶間亦以野人之向正者爲都指揮都督統之爲我藩屏而松花江東北一月之程所謂黑龍江之地則又立奴兒干都司時遣使往招諸夷有願降中國者於開原設安樂州遼陽設自在州居之皆量授以官任其耕獵歲給俸如其官當時各衛夷人每入貢賚賜殊厚以故凡迤北征討皆聽調遣無敢違越永樂末招降之舉漸弛而建州女直先處開原者叛入毛憐自相攻殺宣德間朝廷復遣使招降之遼東守臣遂請以建州老營地

俾居之老營者

朝廷歲取人參松子地也名爲

東建州初止一衛後復增置左右二衛而夷人不過數千然亦歲遣使各百人入貢以爲常其地則遼東自山海關直抵開原道路如一之字南瀕大海三面皆夷虜至爲難守其性則建州女直詭詐過於海西海西過於朶顏等三衛蓋海西建州馬步能戰而朶顏三衛止長於騎射故也自北虜也先猖獗三種之胡遂皆歸之正統十四年也先犯京師脫脫卜花王犯遼東阿樂出犯陝西各邊俱失利而遼東被殺虜尤甚以故朶顏三衛并海西建州夷人處處蜂起遼

東爲之弗靖者數年至景泰後始克寧謐而海西野
人女直之有名者率死于此先之亂朝廷所賜璽
書盡爲也先所取其子孫以無授官璽書可徵不復
承襲雖歲遣使入貢第名曰舍人以是在道不得乘
傳置錫宴不得預上席賞賚視昔又薄皆忿怨思亂
遼東人咸知之而時未有以處之也積至成化二年
建州都督董山等梟雄桀黠乘是以動海西之夷擁
衆入寇守臣以聞朝廷命太監黃順總兵官武靖
伯趙輔左都御史李秉往討之輔等旣降董山則逮
赴京師而山仍桀驁北行至廣寧輔等以爲山若復

歸貽患必大奏 朝廷遂誅山而安置其黨于兩廣
福建且復進攻之時雖克捷而所失亦不少矣然邊
境亦賴以寧至成化中元之遺孽滿都魯僭稱可汗
虜酋朮加斯蘭爲太師節犯宣府聲勢甚大警報殊
急予乃以兵部右侍郎奉 命整飭遼東邊備以防
胡時成化十二年八月也九月卽抵遼東遍歷險要
繕城堡利甲兵練軍士選精壯凡所以爲防虜計者
罔不殫心力虜人覬知我有備遂不復發適山東左
布政陳公鉞以右副都御史來巡撫遼東後予而至
凡備禦都拮揮等官輒逮于理旣當法則止罰馬罰

草而復俾葢戎政由是馬之價皆削剝軍士不復顧
忌予旣防胡歸京師則以十五事上陳而禁巡撫官
罰馬於軍職者亦與焉陳遂以爲隙先是海西兀者
前衛都指揮散赤哈上番書言開原驗放夷人管指
揮者受其珍珠豹皮兵部移文遼東守臣勘之管指
揮者懼乃因本衛都督產察係散赤哈姪入貢歸賄
求產察言管實無所受散赤哈聞之深怨產察聲言
聚衆犯邊邊將以情報守臣守臣乃譯番書招散赤
哈來廣寧面折散赤哈遂率所部十數餘人欲出撫
順關進赴廣寧時叅將周俊等守開原恐散赤哈至

則真情畢露乃遣使馳報廣寧守臣詭云海西人素不由撫順關進恐熟知此道啟他日患守臣不虞其詐也卽召其使速阻之時散赤哈已聞之大怒折箭誓恨復歸至撫順所備禦都指揮羅雄知事不協其酒食慰遣出關時建州三衛女直亦欲報誅董山之怨而全籍海西之勢緣此遂留散赤哈于建共來犯邊勢漸昌熾向使不阻散赤哈以啟之邊患爲之息矣守臣以聞乃招土兵大征建州而出榜示衆徒張虛聲實皆顧戀私家不趨遼陽三衛遂得糾合海西人數千餘十四年正月乘虛入境大掠鳳集諸堡

報至廣寧陳懼始赴遼陽而寇出已久矣獨近邊土著虜人也僧格等十八人家皆有使入貢未還恐誤羅兵禍及拘留其使乃走撫順所報訴云犯邊者皆海西人陳與分守遼陽副總兵韓斌意在撲勦夷人以掩罪遂皆拘繫瀋陽衛乃乘夜率諸軍襲各寨屠之訖無所掠人畜而精壯者間亦脫去暨回遂捶死也僧格於獄乃以搗巢之捷聞時太監汪直者勢焰方熾惑於通事王英謂往撫可邀大功上命司禮監出駕帖太監懷公恩以直年少喜功於本年三月初四日同太監覃昌等七人至內閣傳宣兵部尚

書余公子俊侍郎張公鵬暨予比至僉言彼既有使入貢却又屠其家今若之何可以彌釁或言宜以大官酌之予曰官不足以釋其忿且宋以李繼迁爲京官遂致西夏之患懷公曰然則遣大臣同大通事往撫之衆皆曰諾尋宣至內府懷公傳旨建州夷人被大軍征勦恐懷疑懼着兵部侍郎馬文升通事詹昇前去撫安已而王英卽謁予於私居諭汪意欲請與俱予遂謝絕之卽行汪深以爲恨衆皆爲予惧予以事聞朝廷亦無所恤乃疾馳追及入貢夷使重陽等於中途四月初五日抵撫順所先縱重陽左右

一二人歸諭其衆使知朝廷意旨遂有十數人來見卽諭以前意遣歸尋召各衛酋長聽宣璽書由是纍纍皆至而被屠之家數百人悉訴其方遣使入貢無犯邊狀而冒當殺戮又果無刦掠人畜可證今雖仰荷朝廷招來實難於度日子遂承詔各以牛布給慰之且令其酋長赴京適微聞海西雖來聽撫猶思寇掠始歸乃於東寧衛訪嘗爲建州經歷識字熟女直趙安以招降爲名陰探於渠魁卜刺答所果有海西兵馬與否不數日趙安歸云有且賊數千而馬悉蹏壯時分守開原太監韋朗亦遣人來言海西賊

俱動若來遲恐勢不可撫予遂以建州事聞於朝且言夷人雖暫聽撫觀其言貌詞氣尚懷反側難保遽安仍移文總兵官歐信副總兵韓斌叅將崔勝各率所部及調開原叅將周俊帶領開原鐵嶺精兵三千各分伏鳳集堡一帶賊以爲無備矣比予至開原甫三日果數路入寇諸軍以逸待勞遂斬首二百餘級生獲數十人及賊馬器械無筭而所斬者率多海西人馬叅將崔勝周俊馳報陳陳爲功予因并前所論反側情狀及申虜人背逆天道旣聽招安旋復入寇以自取滅亡之禍請移遼東兵勦之或旣奪其心而

姑與更新招撫遣通事指揮李璟聞諸上事下兵部以爲虜人旣撫安垂成只仍招撫以安地方朝廷從之海西人聞之且感且懼都督察等盡歸降乃一體諭之遣其酋入京而遼東守臣奏報十數日方至以故賞皆不行陳以是隙益甚夷旣降予慮其猶踵舍人之怨則檢其先授官子孫之失襲者皆令來見譯審實請兵部於內閣驗授官璽書旅底籍明白再遣遼東守臣勘實令襲官者復十數人夷愈感激汪以夷旣招安曷又入寇復主王英言請帶頭目百餘人給令牌令旗往夷聞其聲勢又無一人復出者汪至

開原更有子原所招出兀者前等衛野人女直堵里吉等三百餘人而予時在撫順汪不與之接皆怒欲歸寨叅將周俊恐敗事乃謂汪曰不可不請馬 欽差來議汪乃遣人至撫順所邀予予亦馳至開原與汪會汪口若之何予曰太監既至此夷卽太監招出者也何問彼此汪揣知事不易遂聽予言俱犒之旣又以騰黃璽書付各寨招安同以事聞已而汪意猶欲再招出示見示已功予曰太監此來旣有令牌令旗彼懼決無敢出者太監第回京可保無虞也汪亦欣然與予俱歸遼陽復會聞於上予至京師 上賜